

Lezing: Jesaja 36 in drie stemmen:

verteller: Jan de Boer

adjudant (rabsake): Frank de Vries

jood: Pauline Cornelisse (?)

1e deel lezing

VERTELLER:

1 In et veertiende regeringsjaor van keuning Hizkia trok keuning Sanherib van Assyrië op tegen de versterkte steden van Juda en nam ze in. 2 Vanuut Lachis stuurde de keuning van Assyrië iene van zien blispoters, de rabsake, mit een geweldig leger naor keuning Hizkia. Hi'j stopte bi'j de waertoevoer naor et boverste waeterbekken, an de straote van et blikveld. 3 Hofmeester Eljakim, de zeune van Chilkia, hofschriever Sebna en kanselier Joach, de zeune van Asaf, gongen naor him toe. 4 De rabsake zee tegen heur:

ADJUDANT:

"Zegge tegen Hizkia: "Dit zegt de grote keuning, de keuning van Assyrië: "Waorop berust toch dat vertrouwen van jow? 5 Ik zol toch daenken dat al die mooie beloften niet opwegen tegen strategie en militaire macht. In wie stellen jow zoe'n protte vertrouwen dat jow tegen mi'j in opstaand durven te kommen? 6 Jow vertrouwen op Iegypte, die knakte rietstengel die je haand deurboort aj' d'r op perberen te leunen! Want meer het de farao, de keuning van Iegypte, niet te betekenen veur degenen die heur vertrouwen in him stellen. 7 En jow kunnen mi'j now wel zeggen: "Wi'j stellen oons vertrouwen in de Heer, oonze God," mar was et niet krek die God die zien offerplakken en alters jow, Hizkia, weghaelen laoten hebben? Jow hebben ommes tegen de bevolking van Juda en Jeruzalem zegd: "Allienig veur dit alter meugen jim daeleknielen?" 8 Now dan, waoge jow kaans mit mien heer, de keuning van Assyrië. Hi'j zal jow twieduzend peerden geven, as jow in staot binnen om de ruters daor veur te leveren. 9 Zolange as jow veur striedwaegens en ruters op Iegypte vertrouwen, zullen jow ommes nog niet de ofveerdigde van de meenste knecht van mien heer weerstaon kunnen. 10 Jow daenken toch niet dat hi'j zonder instemming van de Heer optrokken is om dit laand te vernietigen? De Heer het tegen him zegd: "Vaal dit laand an en vernietig et."

2e deel lezing

VERTELLER:

11 Eljakim, Sebna en Joach zeden tegen de rabsake:

JOOD:

"Praot asjeblijf Aramees mit oons, heer; dat verstaon wi'j. Praot toch gien Judees tegen oons, et volk op de mure luustert mit."

VERTELLER:

12 Mar de rabsake zee doe:

ADJUDANT:

"Dochten jim dat mien heer mi'j stuurd het om et woord allienig tot jim heer en jim te richten? Oonze woorden bin krek zo goed bestemd veur de meensken daor op de mure, die bi'jkotten krek as jim heur eigen drek eten zullen en heur eigen waeter drinken zullen."

VERTELLER:

13 En de rabsake rechtte zien schoolders, verheef zien stemme en reup, in et Judees:

ADJUDANT:

"Luuster naor wat de grote keuning, de keuning van Assyrië jim te zeggen het! 14 Dit zegt de keuning: "Laot jim deur Hizkia gien rad veur ogen dri'jen, hi'j is niet in staot om jim te bevri'jden. 15 Laot hi'j jim niet verleiden om jim vertrouwen te stellen in de Heer. As hi'j beweert: "De Heer zal oons vaaste en zeker redden en disse stad zal niet in hanen valen van de keuning van Assyrië," 16 luuster dan niet naor him. Want dit zegt de keuning van Assyrië: "Geef jim over en stel jim onder mien hoede, dan kan iederiene van jim van zien wienstok en zien viegeboom eten en et waeter uut zien eigen putte drinken, 17 tot ik komme en jim mitneme naor een laand dat niet onderdot veur dat van jim: een laand van graon en wien, van bolle en droevetunen. 18 Laot Hizkia jim gien valse hope geven mit zien bewering dat de Heer jim redden zal. Hebben de goden van aandere volken heur laand dan redded uut de hanen van de keuning van Assyrië? 19 Waor bin de goden van Hamat en Arpad bleven, waor weren de goden van Sefarwaïm? Hebben die Samaria seins uut mien hanen redded? 20 As gien inkelde god in staot bleken is om zien laand uut mien hanen te redden, hoe zol dan de Heer Jeruzalem redden kunnen?"

VERTELLER:

21 Mar zi'j zwegen en zeden doe gien woord, want zo hadde de keuning et beveulen. 22 Hofmeester Eljakim, de zeune van Chilkia, hofschriever Sebna en kanselier Joach, de zeune van Asaf, gongen mit scheurde kleren naor Hizkia om him de woorden van de rabsake over te brengen.